

25/04/2000

Penternakan ikan wajar diperluas

PENINGKATAN pelaburan dalam sektor perikanan di negara ini tidak harus menumpukan kepada keuntungan industri semata-mata, sebaliknya turut memperbaiki status nelayan dan pemuliharaan alam sekitar.

Walaupun permintaan terhadap sumber protein itu semakin meningkat, pelaburan dalam bidang itu tidak harus menyaksikan lebih banyak ikan ditangkap tetapi lebih banyak ikan ditenak.

Penasihat Kanan Pengurusan Perikanan Program Teluk Bengal, Madras, India, Dr Kee Chai Choong, berkata keghairahan industri memenuhi permintaan yang semakin meningkat pada masa lalu menyebabkan kebanyakan perairan kehabisan stok.

"Dalam tempoh 25 tahun akan datang, permintaan terhadap ikan akan bertambah dan kita memerlukan sekurang-kurangnya dua kali ganda kuantiti ikan berbanding sekarang.

"Kita tidak boleh menggunakan semua sumber sedia ada tanpa usaha untuk meningkatkan pengeluarannya. Untuk itu, pelaburan dalam sektor ini pada masa akan datang perlu meningkatkan pengeluaran ikan yang menyaksikan pembabitan pelbagai pihak selain kerajaan," katanya.

Beliau berkata demikian ketika membentangkan kertas kerja bertajuk 'Peluang Pelaburan dalam Industri Perikanan' yang dirasmikan Perdana Menteri, Datuk Seri Dr Mahathir Mohamad.

Dr Kerk berkata, Malaysia juga perlu bergerak ke arah itu dengan memperkembangkan pelbagai teknologi ternakan ikan, termasuk ternakan dalam sangkar (akuakultur).

Beliau berkata, Dasar Pertanian Ketiga (2000-2010) meramal akan membekalkan kira-kira 30 peratus atau 600,000 tan ikan daripada jumlah ikan di negara ini menjelang 2010 berbanding hanya 10 peratus, sekarang.

Pada masa yang sama, katanya, pelaburan dalam sektor pertanian juga harus disalurkan untuk tujuan pemuliharaan dan pengurusan sumber semula jadi.

(END)